

# Txirritola

ARAMAIO / Eguaztena / 2003ko apirilaren 16a / 62. zenbakia

KOORDINATZAILEA: Ubane Madera • Otolara Lizenziaduna 31 20500 ARRASATE • Tel.: 943 71 25 11 • Faxe: 943 71 23 89 • Posta elektronikoa: txirritola@goiena.com • Lege gordailua: SS.1084/02


## Ia 20 sagardogilek hartuko dute parte aurtengo Sagardogile Egunean

UBANE MADERA

Txirritola Euskara Elkarteak buru-belarri dabil aurtengo Sagardogile Eguna prestatzen. Datorren apirilaren 27an izango da, eta gutxi gorabehera 20 bat sagardogilek parte hartzea espero dute. Hala adierazi digu Mikel Arantzabalek, antolatzaileetako batek.

San Prudentzio bezperan sagardo usaina izango da nagusi Bizente Goikoetxea plazan. Txirritola Euskara Elkarteak gonbidatuta, 20 bat sagardogilek euren edaria herritarren eskura ipiniko dute, gura duenak proba dezan. Gainera, iaz baino sagardogile gehiago izango dira. Azkoagan, Untzillan, Ibarren, Eguzkierripan, Barajuenen... Herriko ia auzo guztietan egindako sagardoa egongo da plazaren bueltan. Herriko trikitilariak eta bertsolariak giroa berotzen lagunduko dute; eta, ohitura den moduan, pintxoak eta taloak ere egongo dira. Bitxikeria moduan, aramaiarrak ibiliko dira taloak egiten; iazko Sagardogile Egunean egindako Talo ikastaroan parte hartu zutenak, hain zuzen ere.

Eta, horrelakoetan ohi denez,



UBANE MADERA

Sagardogile Egunean bezpera moduan, sagardo ikastaroa izan da Aramaion; jende mordoak parte hartu du.

sagardoa edan gura duenak edalontzia erosi, eta gero gura duen guztia edan ahal izango du. Aurtun bi eurotan salduko dute edalontzia.

Hirugarren Sagardogile Eguna ospatuko dute aurtun. Eguna horren helburua da herriko sagardogileei egiten duten lanarengatik esker ona adieraztea.

### BERRITASUNAK

Berritasun bi egongo dira aurtengo Sagardogile Egunean: alde batetik, argazki erakusketa ipiniko dute plazan bertan. Txirri-

*Sagardoa egiteko tresneria ipiniko dute eta tresneria horrekin muztioa egingo dute plazan*

tolako kideak baserri baserri ibili dira sagardoa egiteko prozesuari argazkiak ateratzen, gero herritarrei erakusteko.

Era berean, sagardoa egiteko tresneria ipintzeko asmoa dute antolatzaileek (dolarea, kupelak, sagarra...); eta tresna horiekin plazan bertan muztioa egin gura dute, hain zuzen ere, sagardoa egiteko prozesua guztiei zuzen-zuzenean erakusteko.

### IKASTAROA

Bestalde, Sagardogile Egunean bezpera moduan, Sagardo ikastaroa egin dute Aramaion. Jende ugari hartu du parte; besteak beste, sagardoa egiten dute 24 baserriarrek, baita inguruko herrietatik etorritakoek ere. Txirritola Elkartearen iritziz, sekulako arrakasta izan da.

## Egun bete-betea izan zuten Arbel Egunean

UBANE MADERA

Arbel Egun biribila izan dute aurtun bazkideek. Goizean meza entzun eta elkartaren kontuak onartu eta gero, guztiek batera bazkaldu zuten eskolako jangelan. 85-90 bat lagun elkartu ziren. Bazkalostean, berri, herri kirolak izan zituzten kiroldegian eta gauean, pilota partiduak.

Arbel Elkarteak batzar orokorra egiten duenean, zelanbait, aramaiar guztiek dute egun hori aprobetxatzeko aukera; izan ere, makina bat ekitaldi antolatzeak ohitura du Arbel Elkarteak.

Aurtun ere hala izan da. Goi-

zean elkartaren gaineko batzar orokorra egin zuten, eta elkartaren kontuak onartu zituzten bazkideek. Horren ostean bazkaria egin zuten. Eta bazkalostean, 17:15ean kiroldegira joan ziren guztiak; izan ere, han VI. Urrezko Aizkorarako kanporaketa jokatu zuten Iñaki Azurmendik eta J.J. Barberenak, eta Iñaki Azurmendik irabazi zuen. Horren aurretik Saralegi eta Atxa harri-jasotzaileek erakustaldia egin zuten.

Gauean pilota partidua egon zen: Legorburuk eta Errandonea Lak Badiola III.aren eta Gabarri II.aren kontra jokatu zuten. 22-21 izan zen emaitza, Legorbururen eta Errandonea I.aren alde. Hortaz, partidu entretenigarria izan zen.



MIKEL ARANBURU

Urrezko Aizkoran Iñaki Azurmendi gailendu zen.

### LABUR

#### Areto futboleko aste bukaerako emaitzak

Bañerako talde biek galdu egin zituzten aurreko aste bukaerako partiduak. Hala, gazte mailako taldeak 1-5 galdu zuten Aurrera taldearen kontra eta neskek Kopa Txapelketako aurreko partidua 10-1 galdu zuten Jesus Obreroren kontra.

Bestalde, Aste Santuko oporrak direla-eta, Bañerako taldeek jai hartuko dute. Gero, oporren ostean, maiatz inguruan hasiko dituzte partiduak. Bien bitartean, atse-denerako tartea izango dute oporretan.



## TELEFONO JAKINGARRIAK

### OSASUNA / LARRIALDIAK

Osasun etxea (txandak) .....	945 44 53 40
Botika .....	945 44 50 03
Udaletxea .....	945 44 50 16
Ertzaintza (Arrasate) .....	943 79 71 99
Gurutze Gorria (Legutio) .....	945 45 52 52
San Martin Eskola .....	945 44 50 04
Taxia eta autobusak .....	945 44 50 33
Udal Kiroldegia .....	945 44 53 35
Postetxea .....	945 44 50 83
Zujiako Eskualdea .....	945 43 01 67
Suhiltzaileak (Zubillaga) .....	943 78 28 00

## AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

**OHARRA:** izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

## OHARRAK

### ARGI BARIK

Domeka gauean, 21:30ak inguruan, argia joan zen Aramaion. Antza denez, berriro ere arbolaren bat jausi zen Iberdrolaren kableen gainera. 03:00ak ingurura arte egon ziren argi barik aramaiarrak.

### OPORRAK


Datozen bost egunotan itxita egongo dira Aramaion udaletxea, liburutegia eta ludoteka. Hain justu ere, liburutegia eta ludoteka hilaren 29ra arte egongo dira itxita, apirilaren 28an San Prudentzio eguna delako. Udaletxeari dago-kionez, Pazko Asteazabalduko dute; gero, San Prudentzio egunean, berriro itxiko dute.

### PALETA TXAPELKETA

Urrak eta Pérezek irabazi dute Paleta Txapelketa. 35-26 irabazi zieten Garaitari eta Flores. Hirugarren lekuan Arriolabengoa eta Azurmen-di geratu dira eta laugarren Barandiaran I.a eta Oianguren izan dira.

### ZINEMA

*Harry Potter, la cámara secreta* emango dute.



## 'Lurgorri'-ren izena eta izana berreskuratu dute Aramaion

Goiz benetan bete izan zuten zapatuan Jose Mari Azkarraga *Lurgorri*-ren omenez. Batetik, *Lurgorri*-ren bizitzaren gaineko liburua aurkeztu zuen haren loba Vélez de Mendizabalek. Gainera, *Lurgorri*-ren gaineko mahai-ingurua egin zuten, eta Paco Salaberrik, Vélez de Men-

dizabalek berak eta Jose Mari Azkarragak (Eusko Jaurlaritzako Justizi sailburuak) hartu zuten parte. Gero, pasealeku bati *Lurgorri* izena eman zioten, ohorezko aurrezku eta guzti; eta bukatzeko, idazlearen gaineko erakusketa zabaldu zuten. /ARGAZKIAK: MIKEL ARANBURU


## BOTEPRONTOAN/ Josemari Vélez de Mendizabal · Historialaria eta 'Lurgorri'-ren loba

*“Aramaiorekin hain maiteminduta zegoen, Aramaioko toponimiako izena hartu zuen”*

Jose Mari Azkarraga *Lurgorri* protagonista izan da egunotan. Asteburuan bertan makina bat ekimen egin dituzte idazlea gogora ekartzeko. Tartean, haren loba Josemari Vélez de Mendizabalek *Lurgorri*-ren gaineko liburua idatzi du. Hara zer kontatu zion Arrasate Irratiari, labur:

### Bizitza laburra baina emankorra izan zuen *Lurgorri*-k...

Jaiotzez errenteriarra zen, baina oso txikitik udak pasatzera Aramaiora etortzen zen. Oso estua izan zen Aramaiorekin zuen harremana. 1925-1937 urte bitartean, 12 urte oso sakonak bizi izan zituzten Azkarragatarrek Aramaion. *Lurgorri* Aramaion hazi zen, nahiz eta denbora luzeen Madrilen ematen zuen, familia Madrilen bizi zen-eta. Madrilen Zuzenbidea ikasi zuen eta, era berean, Euzko Ikasle Batza sortu zuen Madrilen bertan. Elkarte hartako presidente izan zen. Euskal kulturaren aldeko giro ikaragarria suspertu zuen. Euskal kulturaren eragile zuten eta sakona izan zen Madrilen, nahiz eta oso gaztea izan. Orduantxe ekin zion idazteari. Produktzio handiena kazetagintzan izan zuen. *Euzkadi* egunkarian artikulu ugari idatzi zituen,



*“Euskal kulturaren eragile zuzen eta sakona izan zen Madrilen; orduan ekin zion idazteari”*

baita *Euzko Langile* aldizkarian ere, *Gudari*-n... Bizitza politikoa eta sindikalagintzan ere jardun zuen, Solidaridad de Trabajadores Vascos-en zegoen afiliatua. Leintz ibarrean eta Aramaioko ibarrean oso lan handia egin zuen. Gerra piztu zenean, Amaiur batailoiko fundatzaileetako bat izan zen. Gero EAJk fronteko gerrako korrespondentia izendatu zuen, bai hemengo frontean baita Asturiasen eta Santanderren ere. Gerraren gainean oso artikulu gogorak eta bortitzak bidaltzen zituen, oso estilo bizi eta onean. Gero komisario politikoa izendatu zuten Aristimuño batailoian, baita San Andresen ere. Santonako Errendizioa deitu izan den faltsukeria horretan atzeman zutenean, El Duesora eraman zuten; han epaitu egin zuten eta Larrinagara eraman zuten 1937ko azaroan. Urte hartako

*“Oso famatua izan zen (...); baina 37an hil zen, eta haren irudia, nolabait, ezabatu egin da”*

abenduaren 16an Derioko kanposantuan fusilatu egin zuten. Aste hartan 600 bat gazte fusilatu zituzten faxistek.

### Nondik dator io izena?

Aramaiorekin hain maiteminduta zegoen, Aramaioko toponimiako izena hartu zuen. Izan ere, *Lurgorri* Tellamendiko esparrutxo bat da. Eta ospetsu egin zuen izen hori.

### Orain *Lurgorri*-ren gaineko liburua idatzi eta aurkeztu duzu...

Liburu apala da. *Lurgorri*-ren gainean askoz gehiago idatz daiteke. Nik uste dut idazle bezala oso ona dela, baita kazetari bezala ere. Poeta ere bada, poeta ikaragarria. Espetxean zegoela egin zuen azkeneko lana euskal presoek ezkutuan argitaratzen zuten *Espetxean* izeneko aldizkarian egin zuen, hil baino zortzi egun lehenago; Lauaxeta zenaren azkeneko poemari sarrera bat egin zion.

### Ezaguna izan zen?

Oso famatua izan zen. Arrasaten mitinak ematen zituen, adibidez. Baina 37an hil zen eta haren irudia, nolabait, ezabatu egin da. Euskal Herrian bizi duen egokora kontuan hartuta, erreferentzia dugu *Lurgorri*?

Duda barik. Demokrata ikaragarria zen *Lurgorri*.